

Нуриддин ИСМОИЛОВ



**НУРИДДИН ИСМОИЛОВ**

# **ТАНСОҚЧИ**

*Саргузашт-детектив роман*

**Биринчи китоб**

Фафур Фулом номидаги нашриёт-матбаа ижодий уйи  
Тошкент — 2012

**Исмоилов, Нуриддин.**

**Тансоқчи:** Роман: / Нуриддин Исмоилов. — Тошкент:  
Faafur Fulom nomidagi nashriyot-matbaa ijodiy yui,  
2012.

1-kitob. — 288 b.

ISBN

© Н.Исмоилов. «Тансоқчи».  
Faafur Fulom nomidagi  
nashriyot-matbaa ijodiy yui, 2012.

У эшикдан таманно билан кириб келди. Елкаси очиқ, бели бўғма кўйлаги тиззасидан икки қарич баландда эди. Тўғриси, бу ерларда бундай кийинган аёлларни кўраверип, кўзим пишиб кетганди. Шу боис малла сочли жононага унчалик эътибор қилмадим. Аммо у худди фотомоделлар каби бир-бир қадам ташлаб, ёнимга юриб келди-да, билагимдан ушлади ва юзимга қараб жилмайиб:

— Сен қоравойни қаердан топишди? Намунча хушбичимсан? — деди соф рус тилида.

Елка қисиб, юзаки илжайдим. У бўйинин ортига буриб, биздан беш-олти қадамча нарида гаплашиб турган уч эркакка юзланди. Уларнинг учаласи ҳам қора костюм-шим, оқ кўйлак кийган, бўйниларига капалакнусха галстук таққан, қўлида қадаҳ ушлаб турарди. Суҳбатлари шунчалик қизгин эдики, атрофда бўлаётган ҳодисаларга мутлақо эътибор беришмасди. Улардан бири менинг шефим эди. Бўйи бир ярим метр, калбош, қирғийбурун, кўккўз бу одам ер тагида илон қимиirlаса сезадиган устаси фаранглар тоифасидан. У ҳеч қачон овозини баландлатиб гапирмайди. Одати шунаقا. Аммо шундай сўзлайдики, оғзидан чиққан ҳар битта сўз милтиқнинг ўқидай юрагингизни тешиб ўтади.

Колган иккаласи унинг ҳамтовоқлари. Билишимча, улар ёшликтан бирга катта бўлишган. Ҳаммаси бой-бадавлат. Бир нечтадан завод ва конлари бор.

— Александр Абрамович, — деди қиз нозик, ширали овозда.

Хўжайним қизга табассум билан юзланди.

— Настя Евдокимовна, жоним билан эшитаман сизни, — деди шеф.

— Агар мумкин бўлса, икки дақиқа вақтингизни олсам.

— О-о! Нималар деяпсиз, Настя Евдокимовна, сиз учун

икки дақиқа түгүл, бутун умримни ҳам ажратишим мумкин, — деда Александр Абрамович енгил қадам ташлаб, бизнинг ёнимизга келди.

Мен унинг ҳурмати учун секин бошимни эгиб қўйдим.

— Жонгинам, — деда аёл шефнинг қўлини қучоқлаб, манави йигит сизга қарашлами?

У менга айёrona боқиб турарди.

— Умуман олганда, шундай десам ҳам бўлаверади, — деда Александр Абрамович.

— Менга ёқиб қолди. Қаerдан топдингиз?

Аёлнинг саволи нафақат шефга, балки менга ҳам галати туюлди. Шунга қарамай, маданият юзасидан иккимиз ҳам жилмайдик.

— Шунчаки кўчадан, — жавоб берди Александр Абрамович.

— Бунақалар шунчаки кўчадан топилмайди. Бунақаларни ернинг остидан ковлаб олиш керак, — деди Настя Евдокимовна шефнинг бурнини узун кўрсаткич бармоги билан силаб қўяркан.

Ичимдан зил кетди. Зеро, менга бирорларнинг эътиборини тортмаслик топширилган эди. Айниқса, эркакларни кўрганда суяклари бўшашиб кетадиган аёлларнинг.

— Оддий бобонлар баъзан кўчадан топилади, Настя Евдокимовна, — деб шеф аёлнинг қўлидан ўпиб қўиди.

— Сиз ниҳоятда олижаноб ва айни чоғда серҳиммат одамсиз. Лекин булар ҳам бобоннинг шундай лидерлар базмiga келишига асос бўлолмайди.

— Дарвоқе, айтиш эсимдан чиққан экан, ҳайдовчимнинг бугун тоби қочиб қолганди. Шунинг учун машинани бошқаришни Амирга топширишимга тўғри келди.

— Аҳ, ҳайдовчи денг, наҳотки? — деда мийигида кулди Настя Евдокимовна. — Агар астойдил илтимос қилсан, бу ажабтур ыйигитни мен билан янайм яқинроқ таништириб қўярсиз?..

Аёл Александр Абрамовичга суйкала бошлаганди.

— Сиздай мафтункор аёлнинг илтимос қилишига асло ҳожат қолдирмайман, албатта. Бу ыйигит яқин дўстларимдан бири. Бошқа республикада яшайди. Ўша ёқларга борганимда роса ҳожатимни чиқарган, шундан буён дўстмиз. Аммо ишга мутлақо дахли йўқ, — деда кўрсаткич бармо-

гини юқорига кўтарди хўжайин. — Яъни айтмоқчиманки, менга бўйсунмайдиган инсон.

— Демак, ҳамма қатори меҳмон, — деди кўзлари ча-рақлаб кетган Настя Евдокимовна.

Хўжайин мўлжални аниқ олган эди. Зеро, бу инжиқ хотиндан бош-қа йўл билан қутулиб бўлмасди.

— Афв этасиз, хоним. Биз эркаклар фақат иш учун дунёга келганимиз. Шу боис гоҳида латиф суҳбатлардан бебаҳра қолишга мажбурмиз, — дея жилмайган Александр Абрамович аёлнинг қўлидан яна бир марта ўпиди-да, унинг суҳбатлари узилмаган ҳамфирлари ёнига кетди.

— Хайрият, — дея менинг қўлимни қучди Настя Евдокимовна, — сиз билан ёлғиз қолишни жудаям хоҳлаётган эдим.

— Адашмасам, эрингиз ҳамроҳлигида келгандингиз, — дедим мен аёлдан қутулиш ва ташқарига чиқиб кетиш учун.

— Сиз менинг эримни танийсизми?

— Асло. Аммо салобатли эркак сизни белингиздан қучиб...

— Демак, дарров эътиборингизга тушганман, — дея бирдан гапимни бўлди аёл.

— Келишингиз билан нафақат мен, балки ҳамма эркакларнинг қўзи сизда бўлди. Адашмасам, ҳозир ҳам шундай.

— Аммо уларнинг бирортаси ҳам мени сизчалик ўзига ром этолмади, — дея қўзини қисиб қўйган Настя Евдокимовна тиззаси билан секин оёғимга туртиб қўйди ва паст овозда: — Бугун мени кузатиб қўйишишингизни истайман. Миша... Миша ичкиликни хуш кўрадиганлар тоифасидан, ундан хавотир олмасангиз ҳам бўлади.

Мен аёл нимани истаётганини аввал бошданоқ англаган эдим. Айни шу гап бўлмаслиги учун жуфтакни ростлаш имкониятини қидираётгандим, бироқ улгурмадим.

Аёл ўпишим учун қўлини тутди. Тўгриси, бошқа иложим йўқ эди. Мендай одамга юқори мартабалилар базимида аёллар қўлини ўпиш тақиқланганди. Аммо одобсизлик қилишга ҳам ҳақим йўқ. Аёлнинг қўлига зўрга лабимни теккиздим. Бошимни кўтариб, зимдан шефнинг

қараб турганини кўрдим. Айни чоғда у томонга ўгирил-маслигим, шунинг билан бирга бошқаларда ҳам шубҳа уйғотмаслигим зарур эди. Айниқса, ёпишиб олган мана-ви аёл мендан хавфсираб қолмаслиги лозим эди.

Настя Евдокимовна менга эҳтиросга лиммо-лим та-бассум ҳадя этгач, секин эшик томонга юрдим.

Ташқарининг зах, муздай ҳавоси қўксимга урилганида, танам яйраб кетди. Одатда, бундай лаззатланишни ҳар куни тўрт-беш соат жанг санъати билан шугулланиб бўлгач, совуққина душ қабул қилганимда ҳис этардим.

Тунги чироқлар ёруғида ичкаридаги ўн беш зўравон амалдор ва бойваччанинг ҳар бирининг камида иккита-дан тансоқчиси айланиб юрар, баъзилари бир-бири би-лан оғзидан тамаки тутунини пага-пага чиқазганча гап-лашиб туришарди. Уларнинг диққати эшикда. Ким чи-қаяпти, ким кирайпти, афти-ангоридан тортиб, юриши-гача эътибор беришади. Албатта, мен ҳам уларнинг бит-тасиман. Аммо улар ёнида бўлиш менга мумкин эмас. Шундоғам шефнинг икки йигити турибди. Икковиям бар-занги, ҳеч нарсадан қайтмайдиган йигитлар. Улар мени кўришлари билан сергакланишди. Аммо ёнимга келиш-мади. Мумкинмас. Чунки мен хуфия тансоқчиман. Жуда зарур бўлгандагина хўжайнини ҳимоя қиласман. Бошқа пайт ўзимнинг борлигимни бирорвга билдирамаслигим ке-рак.

Чўнтағимдан сигара чиқардим. Уни бармоқларим ора-сида бироз айлантириб тургач, яна ичкарига кирдим. Биринчи навбатда шефга нигоҳимни қаратдим. Унинг ҳам кўзи эшик тарафда экан. Секин бошини қимирлатиб қўйди. Бу Настя Евдокимовна билан хушчақчақлик қили-шимга изн эди.

Майин мусиқа янграётган улкан залнинг ўртасига меҳ-монларни четлаб ўтиб бордим. Думалоқ стол устига те-риб қўйилган қадаҳлардан бирини қўлимга олдимда, ла-бимга олиб бордим. Озгина ичган бўлиб, нигоҳим билан Анастасия Евдокимовнани қидираётгандим, унинг ўзи келиб қолди.

— Дўстингиз бирон юмуш билан жўнатиб юбордими, деб кўрқандим, — деди у мени қўлтиқлаб.

— У фақатгина дўст. Дўстнинг илтимоси бўлиши мум-

кин, лекин иш буюришга, билмадим, қай даражада ҳақи бор, — дедим унга жилмайиб боқарканман.

— Буни қарангки, сиз ҳақсиз. Аёлларнинг баъзан оддий нарсаларга ҳам ақли етмайди. Майли, мавзуни ўзгарилик.

— Дарвоқе, эрингиз кўринмайдими?

Настя Евдокимовнанинг шу заҳоти қовоғи уйилди.

— Фалокат босиб унга хотин бўлиб қолганман. Энди ажрашишнинг иложи йўқ. Албатта, ажрашсан, мол-мулкининг қарийб ярмига эга чиқаман. Аммо у мени соғ кўймайди. Ҳозир у рес-тораннинг иккинчи қаватидаги алоҳида хоналардан бирида кўнглини хушляяпти жононалари билан. Яхшики, сизни учратиб қолдим. Йўқса, яхшигина жанжал кўтарган бўлардим. Албатта, ўта маданият билан. Ҳозир менга шуниси дуруст. У ичади. Ҳар доимгидай маст бўлади. Кейин эрталабгача хуррак отиб ухлади... Дугонангиз борми?

— Афсуски... — дедим мумкин қадар хушчақчақ кўришишга ҳаракат қилиб. — Шу масалада кўпам омадим юришавермайди. Эҳтимол, қоралигим...

— Асло, — деб у бармоқларини лабимга босиб, гапиртирмай қўйди, — асло бунаقا дея қўрманг. Сиз мана шу бойваччалар орасида энг кўркамисиз. Қадаҳни олаёттанингизни, жуда бир нозиклик билан вино ичганингизни кузатдим. Аслида, фақат мен эмас, базмдаги бошқа аёллар ҳам сизни кўздан қочиришмаяпти. Биринчи имконият пайдо бўлиши билан ўзиники қилиб олиш ҳаракатига тушишади. Мен эса доим биринчи бўлишни истайман.

— Жуда мақтаб юбордингиз, аслида, мен бунчаликка лойиқ эмасман, хоним.

— Хаёлимда вақтни бекор ўтказаётганга ўхшаймиз.

— Ҳозирча ўзгасининг иложи йўқ, хоним.

— Тушунарли, сиз ҳам бошқалар, хусусан, менинг эрим каби эҳтиёкорсиз.

— Адашмасам, эрингиз эҳтиёткорликни унутиб...

— Унақа эмас. У ҳар доим атайин шунаقا қиласади...

Настя Евдокимовна ортиқча гапириб юборгандай бирдан сўзлашдан тўхтади. Шу аснода билинар-билинмас атрофига бир назар ташлаб қўйди.

Ваҳоланки, мен унинг нима демоқчилигини яхши англаб турадим. Қолаверса, англаганим унинг жазога тортилиши даражасида эмасди. Яна шу нарсани билардимики, Настя Евдокимовна Дмитрий Андреевичнинг ҳақиқий хотини эмас. Аслида, қонунан хотини ҳақиқатан ҳам шу аёл. Бироқ бу расмиятчилик юзасидан, холос. Умуман, Дмитрий Андреевичнинг ҳақиқатан ҳам хотини борйўқлигини ҳеч ким билмайди. Эҳтимол, анави иккинчи қаватдаги қизлардан бирортасидир. Буям ҳақиқатдан йироқ. Чунки ҳақиқийлар бунақа жойларга олиб келинмайди. Сабаби хатарли. Хатар шундаки, исталган пайтда исталганча хунрезлик содир этилиши мумкин. Яна битта факт аниқ, Анастасия Евдокимовнанинг эри тепада ишрат қилаётгани йўқ. Ҳаттоқи ичаётгани ҳам гумон. У тахминан ярим соатлардан сўнг ертўлада ўтажак йигилишга тушиб келади. Албатта, орқа, хуфия эшиқдан. Ҳозир маслаҳатчиси билан гаплашиб ўтирибди.

— Ростини айтсам, роса қорним очқади, — деди оз муддатли жимликдан сўнг Настя Евдокимовна. — Кичик залга ўтиб, тамадди қилиб олишга нима дейсиз?

— Буни қарангки, айнан кўнглимдагини топдингиз. Нонушта, тушлик айнан бугун бизни четлаб ўтган эди.

Анастасия Евдокимовна қулиб юборди ва мени қўлтиклиб, кичик зал томонга етаклади.

Залдаги ҳамма столларнинг усти турли ноз-неъматлар, егулик-ичгуликлар билан тўла эди. Хоҳлаганингизга ўтиришингиз, истаганча еб-ичишингиз мумкин эди.

Биз зал ўртасидаги столлардан бирига бир-биримизга рўпара ўтирдик.

— Адашмасам, Александр Абрамович сизнинг исминизни Амир деб айтади, — деди аёл кафтларини бир-бирига ишқалаб.

— Шундай. Бироқ буни қарангки, исмимнинг маъносини билмайман. Лекин манави шишадаги грузин виносининг таъмидан яхшигина хабардорман. Агар лозим топсангиз, бир қадаҳдан ичсак, — дедим мен аёлнинг фикрларини чалғитиши мақсадида.

— Айни муддао, — жавоб берди аёл табассум билан.

— Рухсат этинг, — дея ўрнимдан туриб, аввал унинг қадаҳига, сўнг ўзимникига қаҳрабодай суюқликни қўйдим.

Очиғи, ҳар сонияда ва ҳар қандай шароитда ўта зийрек бўлишим шарт эди. Шунга қарамай, бир қадаҳ вино ичдим. Кейин иштаҳа билан тамаддиланишга тушдим. Айни чоғда рўпарамдаги аёлнинг ҳар битта ҳаракатини кузатаяпман. Унинг оғзидағи луқмасини қанча вақт чайнаб, кейин ютгани ҳам эътиборимдан четда қолмасди.

Биз тахминан йигирма дақиқача гоҳ сўзлашиб, гоҳ таом еб ўтиридан. Кейин у безовталанди.

— Афсуски, сизни ёлғиз қолдиришга мажбурман, — деди Анастасия Евдокимовна кулиб. — Аммо меҳмоним бўлганингизда асло танҳо қолдирмайман. Шунаقا ишлатайки...

Ўзининг гапи ўзига нашъя қилди, шекилли, у хохолаб кулиб юборди ва шу заҳоти кўзини олиб қочди. Ана шунда қўнглим қандайдир ноҳушликни сезди.

— Сизнинг хизматингизда бўлиш мен учун ҳам шарап, — дея ўрнимдан турдим.

Биз катта залга кирганимизда, у ерда анчагина галағовур кўтарилганди. Мен кўзим билан Александр Абрамовични қидирдим. У залда йўқ эди. Бизга тегишли бўлган икки тансоқчи эса атрофга бесаранжом боқарди. Демак, нимадир бўлган ёки бўлиш арафасида. Энди ўша ниманидир аниқлаш, унга қарши чора қўллаш менинг ишим эди. Хаёлимдан энг аввал Анастасия Евдокимовна ўтди. Ахир унинг сўнгги хатти-ҳаракати галати эди. Қизик, қаерга йўқолди? Мендан бор-йўғи бир дақиқа олдин чиққанди.

Секин йигитларнинг ёнига бордим. Уларнинг ҳар иккиси ҳам мендан кўзини узмасди.

— Яхши шароб экан, татиб кўриш керак, — дедим ўзимни хотиржам тутишга ҳаракат қилиб.

— Беш дақиқа олдинга сурилибди. Ҳозиргина кириб кетишди, — деди улардан бири.

Кўнглим бирозгина таскин топгандай бўлди. Бироқ шу заҳоти Анастасия Евдокимовнага кўзим тушди-ю, бирдан олдинги ҳолатимга қайтдим.

— Шефни чақириб олишнинг имконияти борми? — сўрадим йигитлардан.

— Нима бўлди?

— Нотинчлик борга ўхшайди.

— Аниқлаш керак...

У гапини охирига етказмасидан гумбурлаган овоз эшилди. Овоз түлкени шунаقا кучли эдики, ресторан деразалари чил-чил синиб кетди. Залда солланиб юрган аёллар қийқириб юборишли. Бир-иккиси ўзини ерга ташлади. Бу ернинг эркакларига портлаш товуши бегона эмасди. Гумбурлаган товушни эшитиб, бошини бироз эгганлар бўлди. Сўнг ҳамма бесаранжом у ёқдан-бу ёққа югура бошлади. Тахминан портлаш қаерда содир бўлганини билардим. Шу тарафга юурдим. Бирдан кўзим қуюқ туманга тушди. Қадамимни тезлатдим. Мендан олдин йўлга тушган тансоқчиларни четлаб ўтарканман, кўлларидаги тўппончаларга кўзим тушди.

Залнинг ички хуфия эшиги орқали зиналарнинг иккичасини бир қилиб ертўлага тушаётганимда, ўқ товуши ва кимларнингdir инграгани қулогимга чалинди. Хаёллимга “Ертўладаги ярадорларни отиб ташлашаяпти”, деган ўй келди ва шу заҳоти кўйнимдан тўппончамни олдим. Югуришдан тўхтаб, аввал орқа томонга, кейин олдинга қарадим. Яна ўқ товуши ва инграш эшитилди. Шу пайт кимдир:

— Аланга кучайди! — деб бақирди.

Юрагим шув этиб кетди. Чунки ичкарида Александр Абрамович бор эди. Мен уни ҳар қандай шароитда ҳам олиб чиқишим зарур эди. Худо кўрсатмасин, ўлган бўлса, унда тамом, унинг куни менинг ҳам бошимга тушиши муқаррар.

Дарҳақиқат, йўлакда пайдо бўлган аланганинг тили шунчалик узун эдики, ундан қочишнинг сира иложи йўқ эди. Аланга менга яқинлашиб келарди. Бунаقا пайт-да шошилинч қарор чиқариш керак: ортга қайтиш, ё бўлмасам, жонни гаровга кўйиб, аланга ичига ўзни отиш. Мен иккинчи йўлни танладим. Аввал костюмимни ечиб бошимга ёпдим, сўнг ўзимни ичкарига отдим. Зинанинг сўнгги поғонасини босиб ўтаяпман-у, қўлим куяётганини ҳис этаяпман. «Бекор қилдим», деган ўй яшин тезлигида миямга урилди-ю, яна худди шу тезлиқда чиқиб кетди.

Ертўлага тушишим билан костюмни улоқтиридим. Чунки у гуриллаб ёнаётганди.

Улкан зални олов аралаш қуюқ тутун босиб кетганди. Бунаقا ахволда бирорни топиш тугул, кўзни очишнинг ўзи катта азоб эди. Аммо хўжайним Александр Абрамовични топдим. Тўгрироги, у рўпарамда — катта залнинг ўртасига айлана қилиб қўйилган столнинг айнан мен кириб борган томонида боши бир томонга қийшайиб ўтирган экан. Кўзимни зўрга очиб, бурнимни бекитиб, иссиқнинг зўридан елкамни қисиб, атрофга аланг-лаётганимда инграган товуш қулогимга чалинди. Шу тарафга юрдим ва уни топдим. Албатта, афти-ангорига қараш, ҳол сўрашнинг вақти эмасди. Шу боисдан аввал костюмини ечиб олдим, сўнг стол устига ёзилган дастурхондағи нарсаларни ағдариб ташлаб, йиғишириб олдим.

Костюм билан дастурхон ёнгиндан сақланиш учун жуда юпқалик қилишини яхши билардим. Аммо бутунлай куйиб кетгандан кўра, ҳарна, жонни сақлаб қолиш мумкин-ку. Ертўладан чиқиш мен учун жаҳаннамдан қтулишдек бўлди. Аввал дастурхон, кейин костюм гуриллаб ёниб кетди. Кўлларимни оловнинг тили ҳар ялаганда жоними-ни сугуриб олгандай оғриқни ҳис этардим. Сочим ҳам ёниб кетгандир, аммо бу ҳакда ўйлаб ўтиришга вақтим йўқ. Ташқарига чиққанимда ҳовлида уч-тўртта «Тез ёрдам» машинаси тепасидаги чироқларнинг ёниб ўчаётганини қуюқ туман орасида кўргандай бўлдим. Сўнг кўз олдим қоронғилашди...

Кўзимни зўрга очдим ва бошим, қўлларим, умуман, бутун танам дока билан боғлаб ташланганини англадим. Ҳартугул, алнга миямга зиён етказмаган кўринади. Ҳатто тепамда менга термилиб турган қизнинг ҳамшира эканлигини ҳам у гапирмасидан олдин билдим. Фақат битта нарса — қаерда ётганим, афт-ангормининг қай даражада куйгани номаълум эди.

— Ўзингизни яхши ҳис этаяпсизми? — сўради қиз майин товушда.

Савол менга галати туюлди. Ахир одамнинг ҳамма ёғи боғлаб ташланган бўлса, қандай қилиб ўзини яхши ҳис этиши мумкин. Шу боисдан гапирмасдан қўзимни юмиб очдим.

— Иродали йигит экансиз, дарров соғайиб кетасиз. Ҳозир мен сизга дори ичириб қўяман.

У бош томонимга ўтди. Тепамдаги пуштиранг шифтга ҳийлагина катталиқдаги қандил осилиб турганини кўрдим. «Демак, мен касалхонада эмасман. Ўзимизга тегишли бўлган бирорта уйга олиб келишган. Александр Абрамовичнинг аҳволи яхшимикан? Тирикмикан, ишқилиб?» дея хаёлимдан ўтказдим.

Ҳамшира бошнимни бироз кўтариб, оғзимга тугмадай дорини солди-да, орқасидан икки қултумгина сув ичириб қўйди. Бармоқлари лабларимга тегди. Бирам майнин, бирам иссиқ эдики, қўзимни юмиб олдим. Шу билан дори қандай қилиб ичимга кирганини ҳам сезмабман.

Кимнингдир дўриллаган овози менинг эндинига ажойибу гаро-ийиб бўлиб бошланган хаёлимни чалгитиб юборди. Ҳаёл бошқа жойда бўлгач, дарров овоз эгасини таний олмадим. Соғлигимда бирор билан гаплашиб турсам-да, муҳим иш билан банд бўлсам-да, гапирган одамни дарров таниб олардим. Ҳозир негадир чалғидим.

— Қаҳрамон, — деди овоз эгаси тепамга келиб.

Шундагина мен уни танидим. Бу Федя эди. Бўйи икки метр, юмшоқ феъл, узун иякли, қалин қош ва кўк қўзли Федя. Унинг билагида айқнинг кучи бор. Мен у билан қадрдонман. Ҳар қандай одам исталган пайтда панд бериши мумкин, лекин Федя унақамас.

Жилмайишга уриндим, аммо эплай олмадим. Юзимнинг териси тортилгандай бўлиб оғриқ берди.

— Сенинг омон қолганингни кўрганимдан бошим осмонга етди. Лекин гирт ахмоқлигинг тушимга ҳам кирмаган экан. Бунинг учун обдан савалардим-у, аммо имкониятим йўқ. Оғриқлар азоб бермаяптими? — деди у каравотим ёнига стол қўйиб ўтириб олганидан сўнг.

— Чидаса бўлади.

Гапириш оғир кечди. Лабларимни кичрайтириб, тилимни айлантиргунимча қийналдим.

— Ҳечқиси йўқ. Бир ҳафтага бормай, отдай бўп кетасан, — деб у эшик томонга кўз ташлаб қўйди-да, паст овозда сўзлашда давом этди: — Александр Абрамовичнинг аҳволи оғир. Куйиши сенинг даражангда, аммо елкасига иккита ўқ теккан. Залдагилардан яна биттаси тирик қолган. Бош-қалар нариги дунёга жўнаворишибди.

— Кимнинг иши экан? — сўрадим ундан.

Федя елка қисди. Сүнг ўрнидан турди.

— Мен эшик ташқарисида бўлишим керак, қария, — деди ва кетди.

Бир ҳафта қимиirlамай ётдим. Ҳамма нарсани ўйлай-верганимдан ўйлашга баҳона қолмади. Шу вақт мобайнида кўпроқ қишлоғимни хотирладим. Қишлоғимда дарахтлар, айниқса, кўк тераклар кўп. Кўчалар жудаям соясалқин, ёзда тангадай офтоб тушмайди. Кўчанинг ёнгинасидан ариқ ўтган. Кунлар исиши билан ўзимни сувга ташлардим. Шу билан чўмилиш мавсуми кузнинг совуқ кунлари бошлангандагина тугарди. Яна мен яшаган қишлоқда катта-кичик чорвоқлар бор. У ерда ўстган баъзи ўрикларнинг танасига қулочингиз етмайди. Болаларга маза. Кўпинча шуларни эслаганимда, шаҳарда ўсганларнинг болалиги зерикарлидай туйилиб кетади... Хуллас, қишлоғимни, унинг соддагина одамларини соғиниб кетдим. Бир неча марта ичикиб, «уфф»лаб қўйдим. Ахир жондан азиз қишлоғимдан чиқиб кетганимга ҳам оз эмас, кўп эмас, ўн беш йил бўлди-да. Оиласмадагилар билан доим телефон орқали гаплашиб тураман. Уларнинг кўнглини овлаш учун пул жўнатаман. Кўп-кўп. Ота-онами хурсанд қилишни истайман. Бироқ ота-онам шундан сўнг анча вақт телефонимга жавоб бермай қўйишади. Шундан биламанки, мендан аразлашган. «Сенинг пулларингга кунимиз қолгани йўқ», дейишгандагина ўзларини тийишади. Кўришмаганимизга шунча йил бўлган эса-да, кўнглимга қарашибади. Бир сафар укам билан гаплашганимда: «Ака, сиз яхши кўрган қиз бор-у Лола, ўша эрга тегди. Сизни роса кутди, лекин дарагингиз бўлмади. Кейин турмушга чиқди», деди. Ичимдан зил кетди ўшанда. Ахир мен айнан ўша қизни деб дарбадарликка маҳкум этилгандим. Чунки бошқасига уйланишни тасаввур ҳам қилолмасдим. Нега дейизми? Ахир Лолани биринчи синфга борганимдаёқ яхши кўриб қолганман. Аввал чиройли ёзгани, кейин чиройли сўзлагани ва ёшимиз улгайгани сайин меҳрибонлиги, яна аллақандай тил билан изоҳлаб бўлмайдиган хислатлари учун. Хуллас, мактабни битирганимизда биз ҳақиқий ошиқ-маъшуқларга айлангандик. Мен ўқишига кириб, битирганимдан сўнг унга уйлашини режалаштиргандим. Бунга Лола ҳам рози эди.

Аммо ўша давр-нинг раис буваси, яъни унинг отаси: «Тракторчининг боласига берадиган қизим йўқ», деди. Бунисига ҳам рози бўлиб юрган пайтимда, қишлоғимизда гап пайдо бўлди. Эмишки, мен раиснинг қўшниси бўлмиш Эшмирза аканинг қизининг номусига тегибман. Ким билан гаплашмайин, кимнинг ёнига бормайин, шу гап. Бўғилдим. Тўғри шаҳарга — Ноиланинг (Эшмирза аканинг қизи) ўқишига бордим. Иккимиз тўгримиздаги мишишни айтдим. Ҳайратдан унинг кўзлари каттариб кетди.

— Қанақасига?! — деди йигламоқдан бери бўлиб. — Биринчидан, мендан кичкинасан, иккинчидан, ҳар икки ойда бир бораман қишлоққа. Бунинг устига, сени кўрманимгаям камида икки йил бўлди.

— Билмайман, — дедим елка қисиб.

Ўша куннинг ўзидаёқ у мен билан бирга қишлоққа кетди. Уйга кирсам, отам жаҳл отини эгарлаб қўйган экан. Мени кўриши билан қўлига калтак олиб, қувлашга тушиб кетди. На гапимга қулоқ солади ва на сўкишдан тўхтайди. Уйни уч марта айланганимиздан кейин кўчага чиқиб кетдим.

Шу билан бир ҳафта уйга келмадим. Қўшни қишлоқда, жўрамникида юрдим. Кутимаганда янада даҳшатлироқ хабар эшилдим. Эшмирза ака уйимизга борибди. Агар қизимни келин қилмасант, ўглингни қаматаман, дебди. Шу гапдан сўнг қишлоққа олиб борадиган ҳамма йўллар мен учун тақатақ бекилган эди...

Кўпинча ўйим шу ерга келганда тўхтайди. У ёғига ё ҳамшира келиб қолади, ёки Федя кўриниш беради. Агар иккиси ҳам бўлмаса, менинг ўзим сиқилиб кетаман. Дарвоҷе, куни кечга оёғимга ўралган докани ечиб олишди. Терим худди ёғ сачрагандай куйган экан. Дўхтирнинг айтишига қараганда, юзим ҳам шунақсанги аҳволда эмиш. Лекин ҳаммаси тезда тузалиб, билинмайдиган бўлиб кетаркан. Аммо белим оловнинг домида қолиб, нақ бир қарич жойи жуда ёмон куйибди. «Ўша ёнгиндан битта тамга яхшигина эсадалик бўлиб қолади», деди дўхтири.

Александр Абрамовичнинг жароҳати эса анчагина оғир бўлиб чиқди. Федя ёнимга келиб, пичирлаганча:

— Уни бир умрга ногирон бўп қолади, дейишаётчи. Умуртқасидан ҳам ўқ еган экан, — деди.

Тўғриси, унга жудаям ачиниб кетдим. Ниманинг нархи қачон, қанча бўлишини олдиндан биладиган, баъзи воқеа-ларни олдиндан бемалол айтиб бера оладиган одамнинг қолган умрини ногиронликда ўтказишини тасаввур қилиш оғир эди. Лекин на илож, ҳеч бўлмаганда, тирик қолди-ку. Бунинг устига, ҳаётининг охиригача етадиган пули бор. Ҳаммаси Кипр банкларида сақланади.

— Топилдими, итлар?! — сўрадим Федядан.

У қўлини икки томонга ёйди. Кейин одати бўйича эшикка қараб олди-да:

— Дмитрий Андреевич ўша куни йиғилишга кирмаган. У мутлақо талофат кўрмаган бойлардан. Лекин ҳозир қаердалигини ҳеч ким билмайди. Изсиз йўқолган.

— Бундан чиқди, порт-лашни у ўюштирган. Шундайми?

— Эҳтимол. Аммо хабари бўла туриб, бошқаларга айтмасдан кетган ҳам бўлиши мумкин.

— Ҳар қандай шароитда ҳам жавоб бериши керак.

— Кимга?

— Сен ундан бошقا яна икки киши омон қолди, дединг, шекилли.

— Сенга омонлик тилайман, дўстим. Ҳа, айт-ганча, эртага бу ердан кетишими эҳтимоли бор. Ожизни эзиш осонроқ.

Мен каравотга чўзилдим. Федя чиқиб кетди. Қўз ўнгими ни ўша кунги воқеа эгаллади. Дарҳақиқат, Анастасия Евдокимовна жуда безовта эди. Адашмасам, у овқатланашётганимизда тез-тез соатига қараб кўярди. Кейин, кейин... «Мен бу ердан эртароқ чиқишим зарур. Ўша абраҳ-ларнинг ҳаммасини топаман, керак бўлса, жазосиниям бераман. Фақат эртароқ чиқсан бўлди. Ўзи нега ҳалигача чўзилиб ётибман? Баданим бор-йўғи қуйган бўлса... Огриқлар ўтиб кетди. Демак, ҳаракатни бошласам бўла-веради», дея ўйлаб, секин кўзимни юмдим. Шунда негадир юрагим ўз-ўзидан безовта ура бошлади. Назаримда, қандайдир хавф яқинлашиб келаётганга ўхшарди. Дарров каравотдан туриб ўтирдим. Кўп ётганимдан бошим айлангандай бўлди, шу боис бироз унинг ўтиб кетишини кутдим.

Шу пайт бирдан эшик очилиб, ҳамшира қиз кириб

келди. Унинг юзи одатдагидан кўпроқ қизарган, доимо қулиб турувчи кўзларида маъюслик аломатлари зоҳир эди.

— Нима бўлди? — сўрадим ундан дарров.

— Ҳеч нарса, — жавоб берди қиз.

Кўриб турибман, у йиглашдан зўрга ўзини тийиб турибди. Яна бир оғиз нима бўлганини сўрасам, йиглаб юбориши аниқ. Шунинг учун кўнглини қўтариш мақсадида:

— Мен бутунлай согайиб кетганга ўхшайман. Манави юзимга ўраб ташлаган латталаринг ортиқчалик қилаяпти. Ечишнинг имкони йўқми? — дедим.

— Билмадим. Балки, ечиш керакдир. Аммо врач айтмагунча мен ечолмайман, — жавоб берди қиз.

Одатда, у сўзлаётгандা, албатта, лабларида табассум бўларди. Ҳозир шунчалик жиддий гапирдики, мен сўзлаш учун оғиз очишга ботинолмай қолдим. Шу боис ўрнимдан турдим-да, дераза ёнига бордим.

Атроф ўрмон билан қопланган эди. Фақат мана шу мен турган иморатнинг атрофигина яланглик. Қолган жойларнинг баландлиги деярли бир хил бўлган қарагайлар эгаллаб олган, уларнинг остида унда-бунда паст бўйли мен номини билмайдиган буталар, яна майдагина қарағайчалар ўсган. Мен ҳозир уларни кўраётганим йўқ эди. Чунки дала ҳовли атрофини олов рангли баланд девор ўраб турарди. Бута ва ёш қаргайларнинг баланд бўйли ёғочбоп дараҳтлар остида ўсишини илгари кўп кўрганман. Ҳаво намчил. Булут. Эҳтимол, ҳадемай ёмғир ёғса керак.

— Наташа, бир айланиб келсан, нима дейсан? — дедим ортимга ўтирилмай.

Каравотнинг гичирлаган товуши эшитилди. Демак, Наташа жавоб беришдан олдин менинг каравотимга ўтириди.

— Сенга ҳали мумкин эмас, — деди у қайгули овозда.

— Дардингни, барибир, кимгадир айтишинг керак.

Шундагина енгил тортасан.

— Енгил тортмайман, — жавоб берди қиз.

— Нега энди?

— Чунки шаҳарга кетишимга рухсат беришмади.

— Сенга дала ҳовлининг нимаси ёқмаяпти? Тоза ҳаво,

қасрдай курилган иморат, хоҳлаганингча еб-ичишинг мумкин.

— Онам қазо қилибди.

Мен бирдан ортимга бурилдим. Наташа йиглаётган эди. Кўзига қўйилган бўёқ кўз ёши билан бирга юзига оқиб тушганди.

— Ҳозирча бу ердан кетиш мумкин эмас, шаҳаргача камида эллик-олтмиш чақирим келади. Яёв боришнинг имкони йўқ. Машиналарнинг ҳаммаси текширилалаяти, дейишиди. Онамнинг таъзиясига бормаслигим ҳам мумкин. Лекин эндингина тўртга кирган синглимнинг ўзи ёлғиз қолиб кетади, — деди у кўз ёшини кафти билан артаркан.

— Балки сенга ёрдамим тегиб қолар, — дедим унинг сўзларидан ларзага келиб.

— Қанақасига ёрдаминг тегади? Ўзинг бугун ўрнингдан турган бўлсанг... Сенга юриш мумкин эмас.

— Балки сен шундай ўйлаётган бўлсанг керак, лекин менинг ҳеч қаерим оғриётгани йўқ. Бемалол истаганча юра оламан.

Наташа сочини бармоқлари билан таради. У чорасизликдан азобланар, менга эса мутлақо ишонмаётганди.

— Наташа, Федя қаерда? — сўрадим қиздан унга тикилиб.

Наташанинг бирдан юзи ёришиди:

— Мен Андрейга айтдим, ёрдам бер, дедим. Лекин у ярамас кўнмади. Бўлмаса, шу ерга келганимдан бери менга хушомад қилишдан боши чиқмайди. Бир сафар... Майли, бунисини айтмай қўя қолай, ҳартугул, қўлидан ҳеч нима келмади. Федяга айтасанми, шаҳарга етволишимга у ёрдам берадими?

Қиз энтикиб гапирав, менга қаратилган нигоҳи порларди.

— Федяни чақириб бер, — дедим қуруққина қилиб, сўнг тагин дераза томонга ўтирилдим.

Орадан бор-йўғи икки дақиқа ўтар-ўтмас, Федянинг овози эшитилди.

— Қария, дарров оёқقا туриб олибсанми? — деди у.

Мен унга юзландим. Соғайганимни кўрсатиб қўйиш учун илдам юриб бордим-да, каравотимга ўтиридим. Сўнг турдим, хона бўйлаб юрдим.

— Тушунмадим, — деди у менинг хатти-ҳаракатимга ҳайрон бўлиб.

— Нимасига тушунмайсан, биродар? Мен бу ерда ётишдан зериқдим. Кўчага чиқаман. Анавиларни топишими керак.

— Амир, мен сени бир сўзли эканлигингни яхши биламан. Лекин ҳозир бунинг вақти эмас, шаҳарни ҳам, ўрмонни ҳам ағдар-тўнтар қилишаяпти. Биласанми, ўша портлашда ўттиз етти киши ўлган. Москвадан маҳсус гуруҳ ташланган. Уларни ҳеч қанақасига сотиб олиб бўлмайди. Ҳаммадан шубҳаланишяпти улар.

— Мендан шубҳаланишмайди. Уларнинг кўлига тушадиган аҳмоқ ҳам йўқ. Александр Абрамович тузукми?

— Бугун кўзини очди. Бечора тақдир унга қандай мукофотлар тайёрлаб қўйганидан ҳали бехабар.

— Гапирдими?

— Йўқ.

— Мени унинг ёнига олиб бор.

— Балки озгина согайганингдан кейин...

— Кўйсанг-чи шунаقا гапларни. Мен касал эмасман. Ҳа-а, аввал ҳамшира қизни чақир, менинг юзимдаги латта-путталарини олиб ташласин.

— Қойил сенга, Амир, шу туришингда нақ шефнинг ўзиға ўхшаб кетаяпсан! — дея кулди Федя ва ташқарига чиқиб кетди.

«Шефингга ит ўхласин. Озгина ожизлигимни сезса бўлди, дарров менинг баҳримдан ўтиб қўя қолади. Нечтаси билан шундай бўлди. Бир-иккиси ҳатто айби нималигини билмасдан ўлиб кетди», хаёлимдан ўтказдим ва бетоқатланганча хона бўйлаб юра бошладим.

Бирордан кейин Наташа кириб келди. Унинг кўзларида умид учқунлари пайдо бўлган эди.

— Наташа, сен ажо-йиб қизсан. Ана шу ажойиблигингни яна бир кўрсат. Юзимни докаларингдан озод эт, — дедим мумкин қадар унга юмшоқ гапиришга ҳаракат қилиб.

— Врач ҳали рухсат бергани йўқ.

— Наташа, врачни қўя тур, менинг ўзим тиббиёт институтида уч йил ўқиганман. Бошқа нарсани билмасам ҳам, одамнинг куйган жойи неча кунда согайишидан яхши хабардорман. Агар сен олмасанг, ўзим ечаман.



- Lituz.com  
Elektron kitoblar

**To'liq qismini Shu tugmani  
bosish orqali sotib oling!**